

開放文學－歷代筆記－清稗類鈔 姓名類

樓上層以詩句成姓名及字 乾隆季年，東陽有樓更一者，名諸生也，其名曰上層。蓋以唐詩「更上一層樓」句錯綜為之，而姓名及字，皆在其中矣。

姓異名異

進士題名碑錄，滿人中，有姓爾答和尚、豈他他八拜，【俱順治乙未。】白小子，【康熙癸丑。】五哥，【康熙甲戌。】常哥，【康熙丁丑。】騷達子，【康熙丙戌。】蠻子。【雍正甲辰。】漢人中，有王世疆，【順治丁亥，江南鹽城人。】惠羅嗣，【康熙辛未，陝西富平人。】李世倂【乾隆丙戌，陝西三原人。】諸名。榜花【希姓中式見於榜者，謂之榜花。】各姓，則有青伯昌，【順治丙戌，河南洛陽人。】侶鸞舉，【順治己亥，直隸清豐人。】賽玉絃，【康熙丁未，山東靖海衛人。】茆薦馨，【康熙己未探花，浙江長興人。】【康熙乙丑，江南合肥人。】戰殿邦，【康熙乙丑，山東膠州人。】雒倫，【康熙甲戌，河南武陟人。】須州，【康熙乙丑，江南武進人。】叱騮，【雍正癸卯，陝西蒲城人。】秘象震，【雍正甲辰，直隸故城人。】嶽山鵬，【乾隆甲戌，陝西鄜州人。】拱翊勛，【乾隆丁丑，廣西桂林人。】侍朝，【乾隆庚辰，江南泰州人。】粘克昇，【乾隆戊戌，福建晉江人。】要問政【乾隆甲辰，山西太谷人。】諸人。其以地取名者，滿人有喀爾喀。【康熙辛未。】其名類閩秀者，廣東有俞豔雪。【康熙己未。】

康熙間，安邑縣有一人，姓名皆奇，姓為山，【音妾。】名為（身，上去一橫，撇下加口）。【音厥。】

同治間，錢塘孫子授侍郎貽經督學八閩，一日點名畢，入內，笑謂幕友曰：「今日見一姓名，真大奇。」幕友叩所以，曰：「其人姓出。」良久不語。一友問曰：「豈名『精』耶？」曰：「果然。」咸大撫掌。

姓名屬天文

咸豐朝，即補副將雷風雲，諡威毅。光緒中葉，鄂人有張翼軫者，工行草書，嘗游京師，有鬻字潤格在琉璃廠肆，其姓名三字，皆星名，與雷風雲屬對絕工。

姓名屬干支

錢塘丁氏家素封，富藏書，竹舟主事名，松生大令名丙，為同懷兄弟，其從弟頤生明經名午。姓為天干，而名皆為地支也。

以姓為名

以姓為名者，絕無僅有。而光緒中葉，山陰有幕客孫遜者，初名孫，以文童應府試，同學見其姓名之重文也，笑而嘲之，曰：「君對於吾輩，本已為孫矣，今又名孫，是吾孫之孫也，君其為吾輩之玄孫乎？」孫慍，乃改名曰遜。既入泮，幕遊福州，人又曰：「吾孫南走閩矣，走者遜也，故宜加彡。」又光、宣間，有吳江葉楚儉者，亦以姓為名，曰葉葉，善屬文。

滿族以名之一字為氏

氏族之制，簡於夏、殷，而繁於周。夏、殷以姓統其族，有姓而無氏。周人以氏別其族，既有姓，復有氏，因時創制，妙具權衡，千祀相緣，遂成風尚。前宗之者有元魏，近宗之者有滿族大臣。

順、康、雍、乾之朝，滿大臣有以姓之一字為氏者，有以名之一字為氏者，父子祖孫，相沿成習，猶有周人以地命氏、以名命氏之遺意焉。若石，若顧，若舒，若鄂，若尹諸族皆是也。茲約舉之。雍正朝，大學士徐元夢，本姓舒穆祿氏，【舒與徐滿音略同，遂相沿誤。】孫舒赫德，曾孫舒常，此一族乃以姓之一字為氏者也。順治朝，鎮海將軍石廷柱，本姓瓜爾佳氏。子石琳，孫石文炳、石文晟。康熙朝，禮部尚書顧八代，本姓伊爾根覺羅氏，子顧儼，孫顧琮。雍正朝，大學士鄂爾泰，本姓西林覺羅氏，以父名鄂拜，遂以鄂為氏。子鄂容安，孫鄂津。乾隆朝，大學士尹繼善，本姓章佳氏，以父名尹泰，遂以尹為氏，其諸子尚有相沿不易者。此四族皆以名之一字為氏者也。

其餘習俗相稱，亦輒以名之第一字冠於字號之首，哈刺庫不稱李，墨勒根不稱祖，從滿俗也。間有名為滿文而譯漢姓以冠之者。

姓名作對

朱竹垞曾以古人姓名作對，葉調生廣其例，為之補遺，其佳者如公孫丑，母弟辰；鄭小同，楊大異；韓擒虎，李攀龍；陳萬年，張千載；直不疑，何無忌；張惡子，鄭善夫；殷開山，俞通海；張九思，胡三省；王□朋，陸萬友；李桐客，郭藥師；郭蝦蟇，王鸚鵡；劉黑闥，寇白門；郭芍藥，鄭櫻桃；張紅紅，薛素素，皆可與「祭仲足，鮑叔牙」等共稱佳話。文人遊戲，往往喜爭奇鬪勝。昔東方虬自言後世必以己姓名與西門豹作對，有舉「西門豹」屬一九齡童對者，童舉「南宮牛」以應之。

同時同姓名

同姓名之在同時而皆著稱於世不愧為名臣者，則有康熙朝之兩于成龍。一諡清端，山西永寧人，字北溟，官至兩江總督。一諡襄勤，漢軍人，由蔭生知通州及江寧府，後官至河道總督。

道光壬午順天鄉試，旗生中有兩錫麟。一官卷，一民卷，彌封所誤以官卷包入民卷而中式，及填榜，始知為官卷。而是科官卷，額中三名，且溢額，乃以中式第九□一名之旗官卷去之。去一官卷，則民卷缺額一名，匆遽間，以落卷補之。

丁乃一姓名五筆

姓名筆畫最少者，同治朝，有內閣中書丁乃一，三字僅五筆，不易有二也。

九名九姓苗

九名九姓苗，在獨山州。性狡獪，每偽造姓名，變換不已，常以種山為務。

僻姓

僻姓至多，有一字者，俗曰單姓；有二字者，俗曰雙姓；又有三字者，且尚有四字、五字、六字、七字者。列舉如下：
單姓即一字姓，凡一千二百一□六。雲、昌、鳳、花、鄴、廉、安、樂、于、時、和、穆、湛、明、伏、支、咎、賁、滑、於、麴、家、封、羿、邴、松、弓、牧、隗、仰、秋、斜、【音&~KEYG;，子感切。】幸、司、韶、薄、宿、懷、邵、從、鄂、索、咸、藉、蘭、蒙、胥、能、蒼、雙、莘、扶、宰、鄺、郤、璩、通、扈、燕、邴、農、別、充、連、習、宦、【音怡。】魚、容、古、慎、庾、終、暨、居、衡、步、都、滿、弘、國、廣、祿、闕、東、利、蔚、越、夔、隆、師、鞏、庫、【音舍。】勾、融、冷、訾、闕、那、簡、饒、空、母、乚、養、鞠、須、豐、相、後、紅、竺、達、【音錄。】蓋、益、桓、公、言、揭、綦、繁、皇、鄺、達、來、皋、官、多、苟、祭、帥、門、枚、召、折、晉、鮮、過、隨、京、雒、展、海、覃、歸、密、渾、朴、原、諶、敬、彌、疏、商、阿、郇、介、墨、辜、陽、到、漆、塗、弋、膠、練、線、鎖、萇、麥、檀、遲、筮、【音夏。】種、南、余、【音蛇。】真、秘、互、德、大、中、漢、回、藏、法、典、希、有、仁、義、載、道、堯、舜、慶、疆、稷、善、說、政、長、萌、服、邦、質、霸、業、芳、香、襄、軍、楚、學、寒、惡、狂、暢、當、俱、【音貳。】肯、堂、崇、琴、倩、亮、征、操、北、蕃、汝、訓、吾、抱、賞、興、椒、儀、嘉、美、算、斬、遼、昃、【音桂。】者、銀、盤、我、俸、閉、院、寶、雞、督、鞅、州、縣、鼎、革、錦、延、抗、風、雅、才、寬、奇、忠、臣、孝、女、木、蘭、釋、仙、凡、野、佚、市、悅、求、酒、是、朋、友、詩、作、蹇、修、行、素、順、世、守、愚、治、禾、弦、誦、靈、臺、好、問、聖、主、思、信、離、開、望、推、哈、睦、【音鱗。】定、六、新、莽、橫、渠、翼、圖、伯、夷、隱、謀、離、顯、夫、放、蕩、意、而、浮、占、

多、如定、葉朗、鑄督、衛慕、野利、屈懷、密密、默藏、【一作沒藏。】摩益、西壁、覓諾、撒逋、約囉、客藏、沒細、淚丁、韓玉、弩涉、哩鼎、心牟、青唐、咩迷、多多、茄羅、兀賊、成王、&~QANIN;如、米母、沒移。【一作沒&~RHDN1;。】

三字姓，凡七□三。巨辰經、季老男、壹斗眷、一那樓、紇豆陵、若口引、阿史那、阿史德、大利稽、末那樓、越質詰、邱目陵、於古論、兀林歹、阿兒刺、晃【一作兀。】忽難、禿別歹、曲律呂、哈答吉、塔塔歹、散兒歹、乞要歹、列兀歹、兀羅帶、兀里歹、外兀台、外抹台、布兀刺、擔古思、許大歹、撒兀歹、哈答歹、許兀憤、遜【一作孫。】都思、達達兒、脫脫忒、脫脫倫、答失蠻、罕祿魯、魯納只、束呂紉、徹兀台、別倫哥、土別燕、阿刺刺、答答丈、按赤歹、乞咬契、帖赤吉、耐溫台、篤思刺、古麻里、忽都台、索羅真、哈迷里、拜葉倫、魯哈納、札只刺、朵兒只、木八刺、吾和理、迪烈紉、苦里魯、刺乞歹、赤乞歹、恰魯歹、火里刺、撒里哥、禿八歹、密赤思、苦魯丁、甘木魯、天藉辣。【一作台楚嚕。】

四字姓，凡三□九。井疆六斤、目死獨膊、禱碗溫都、列里養賽、郭兒刺姆、【音歹。】也里吉斤、札刺只刺、八魯忽刺、脫里別歹、顏不花歹、顏不草歹、散兀兀台、別帖里歹、那顏乞台、哈忒乞歹、末里乞歹、木溫塔歹、扎馬兒歹、兀羅羅台、外抹歹乃、朵顏別歹、察里吉歹、闊里吉思、禿伯怯烈、脫脫里台、【一作答答里帶。】麥里吉思、【一作蔑兒吉角。】燕【一作衍。】只吉台、兀速兒吉、幹刺納兒、列班塔達、達罕【一作海。】的斤、阿兀思吉、納思馬立、希台特勒、唐兀烏密、禿魯八歹、拙兒察歹、乞失迷兒、唐兀烏密。

五字姓凡□一。忽神忙兀歹、也可抹【一作林。】合刺、阿大【一作塔。】里【一作力。】吉歹、忽神塔乙兒、阿火里力歹、察潭滅兒乞、按攤脫脫里、察罕札刺兒、兀【一作烏。】里養哈姆、苦滅古麻里、哈刺吉答歹。

六字姓凡三。瓦只刺孫答里、列帖乞乃蠻歹、主兒赤臺烏祐。

七字姓一。卜領【一作顏。】勒多禮伯臺。

合姓

合姓，非雙姓也，以二姓併合而成，大率為甥舅、婿嗣翁而又不忍使本宗斬祀者也，不知者，輒疑篇雙姓耳。其著稱於世者，有浙江桐鄉之陸費瓌。瓌為嘉、道間人，字玉泉，官至湖南巡撫。

尹姓為伊無人

順治間，吳中有尹姓者，得罪於友，友作尹字謠以嘲之，云：「伊無人，羊口是其群。斬頭筍，滅口君，縮尾便成丑，直腳半開門。一根長轆轤，打個死尸靈。」

聖祖詔賜朱姓復舊

康熙戊申，詔故明宗室子孫眾多，有竄伏山林者，悉歸田里，姓氏皆復舊。蓋明既鼎革，天潢貴胄轉徙流亡，無不改姓自晦，有改姓林者，並改名時益，改字確齋，隱居寧都，康熙間卒。又咸豐間，有會稽宗滌樓者，名稷辰，嘗為御史，亦明之宗裔也。

陳文簡高文恪聯姓譜

海寧之陳，本出渤海高氏，相國文簡公官京朝時，嘗與高文恪公士奇聯譜，會都御史華野郭琇劾文恪怙寵納賄，並指目文簡交結狀，得旨一併休致。文簡奏辯：「謂臣宗本出自高，譜牒炳然，若果臣交結士奇，何以士奇反稱臣為叔？」事乃得白。

任邱邊

直隸河間之任邱縣邊氏，世家也，累代科第不絕，故順天鄉試向有「無邊不開榜」之謠。

秦大士以姓得利得害

秦大士秦淮絕句，有「淮水而今尚姓秦」句，一時膾炙人口，則以其姓得利也。某年，偕袁子才游西湖，過岳王墳，睹秦檜像，人泥其題句，秦大不懌，子才為代吟曰：「人於宋後羞稱檜，我到墳前愧姓秦。」大士以姓幾受奇窘，微子才，殆矣，是又以姓得害也。

葉芸潭以姓得督學

朱文正公之為掌院學士也，仁宗嘗問以衙門中有學門最優者否，文正誤以為內閣衙門，乃以葉雲素舍人繼雯對，又適忘其名，輒以字對。葉時為內閣中書，充軍機章京，而葉芸潭紹本時為編修。一日，忽奉督學福建之命，入謝。上問其官中書幾年，充章京幾年，典試幾次，同考幾次。時翰林中葉姓僅一人，上意朱所奏者，即而人矣。芸潭至閩，已過歲試，例得留任，在閩凡五年。雲素由部郎改御史，後以言事降官。

舊林新林

左文襄入嘉應州，盡捕附和粵寇之嫌疑者殺之。東王支族有居嘉應州之丙村者，頗繁衍，幾數萬人，乃盡易楊姓，以木字易楊旁，悉為林姓。故稱土著之林姓者為舊林，由楊改姓者為新林。

者貴得姓之原

光緒朝，李文忠督直隸時，有部將，姓者名貴，滇人也，生於合肥。蓋其高曾以事發配至合肥，遂家焉。貴幼失怙恃，不自知其姓。稍長，應募為兵，主募者詢其姓，瞠目不能對，主募者笑曰：「無甚奇，之乎者也，皆可為姓，爾可姓者名貴。」遂以者貴二字注冊籍。從軍久，積功，洊至記名提督巴圖魯，借補直隸通州協副將。

宗室覺羅

本朝發祥長白，自太祖入關定鼎後，顯祖以下之本支子孫皆為宗室，顯祖之伯叔兄弟各支子孫皆為覺羅，皇子皇女及近支所生子女，每歲終，由宗人府記之於表，名曰《星源集慶》。次年正月，交入大內，每遇丁年，纂修玉牒一次。宗室與人私生子，則不入屬籍，賜姓曰覺羅禪，猶言非正支也。

那拉即納蘭

世人皆稱孝欽后為那拉氏，謂其祖出自葉赫，實則那拉即納蘭也。崑山徐健庵納蘭性德【字容若，初名成德，以避東宮嫌名，改曰性德。】墓誌銘中有云：「自明初內附中國諱星懇達爾漢，君之始祖也。六傳至諱養汲弩，君之高祖也。有子三人，第三子諱金台什，若曾祖考也。女弟為太祖高皇帝后，生太宗文皇帝。太祖高皇帝舉大事，而葉赫為明外捍，數遣使往諭不聽，因加兵克葉赫，金台什死焉。卒以舊恩，存其世祀。其次子即今太傅公【即明珠。】之考倪逆韓者，君祖考也。」云云。

滿蒙漢八旗之姓

滿、蒙兩族之姓氏，不著於世，輒以其名之第一字相呼為姓，流俗不察，遂以為其祖父子孫不同姓矣。漢軍本為漢人，有漢姓，其欲依附豐沛，以旗籍自炫者，亦效滿、蒙。

滿洲八大貴族之姓

滿洲氏族，以八大家為最貴：一曰瓜爾佳氏，直義公費英東之後；一曰鈕祜祿氏，宏毅公額亦都之後；一曰舒穆祿氏，武勳王揚古利之後；一曰納喇氏，葉赫貝勒錦台什之後；一曰棟鄂氏，溫順公何和哩之後；一曰馬佳氏，文襄公圖海之後；一曰伊爾根覺羅氏，敏壯公安費古之後；一曰輝發氏，文清公阿蘭泰之後。凡尚主、選婚，以及賞賜功臣奴僕。皆以八族為最。

瓜爾佳氏以蘇完為貴

榮祿係出瓜爾佳氏，而瓜爾佳氏以蘇完為貴。榮官戶部尚書日，遇一都統，展問氏族，則亦瓜爾佳氏，榮曰：「然則吾等乃同族也。」都統轉問有「蘇完」二字否，榮曰：「無。」都統搖首曰：「殆非也。」

蒙古族姓

蒙古族姓分二種骨：曰白，曰黑。白尊而黑卑，白主而黑奴也。白骨者二姓：曰博爾濟吉特，帝裔也；曰烏浪漢濟爾默，后及

駙馬裔也。

蒙古色目西域人改漢姓

改從漢姓之民族，不自元末始，由遼、金而上溯之，姓氏譜中，班班可考。今就元代蒙人後裔之顯於國朝者言之，則沔陽陸氏其一也。有立夫制軍者，名建瀛，咸豐癸丑江寧失守時之兩江總督也。其始祖某，本元之蒙古人，元鼎革時，改漢姓曰陸，始著籍沔陽。蓋元季之亂，蒙古、色目【投蒙古者曰色目。】西域諸子姓轉徙流亡，其存者皆從漢姓，至國朝而相仍弗替，言其著者，則福建之薩為薩都刺後，江西之揭為揭侯斯後，江蘇之廉為廉希憲後。又世所著稱之明人冒辟疆，為如皋著戴，固亦與陸氏相埒也。若合肥余氏，亦劭族，實元末殉節安慶清水塘余忠宣公名闕之後裔。忠宣之先，為唐古特氏，居河西武威郡，父沙刺藏，移居合肥，遂著籍焉。

回人之姓

回旗之遷居內地者，亦標姓於名上，與漢旗同，且亦有漢族之普通各姓，不盡奇僻。

湖南苗姓

湖南諸苗之姓，以吳、龍、石、麻、廖五姓為本種；其楊、施、彭、張、洪諸姓，乃漢民入贅，久與之習，遂儕於苗。

天苗姬姓

天苗，在貴州陳蒙爛土天壩，一名天家，男女皆私奔，多姬姓，相傳為周後。

侗佬之姓

侗佬居湖南，其姓之最多者為張。相傳宋時有江西章姓，兄弟二人為屯長，居此。其後子孫繁衍，分為大章、小章，後改革為張，又分散於各處。次為符、覃、揚、謝、劉諸姓。

瑤姓

瑤族之姓，盤、趙最大，呂、楊、黃次之。

西康番姓

西康番人雖不知姓名，而考其稱謂，姓雖無而氏則有，如德格土司則稱德格家，孔撒土司則稱孔撒家。頭人百姓，亦以地居稱，遷居他處，仍以原地居相稱，此與漢人之稱氏同義。至於命名，或以官，或以神，或以山川，或以草木禽獸，取其吉祥者而名之，亦與漢人之命名相同。惟地居之名相同者眾，命名之義雷同亦多，往往高曾之祖，曾玄不知，亦不能辯族，故婚姻瀆焉。迨後改流，邊務大臣趙爾豐每於設官處所議百字為姓，令民間將現在所知同宗之人共認一字，永遠為姓，番人之姓氏，自此始正。

畚客之姓

畚客之姓，以藍、盆、雷、鐘為同姓，同姓可以結婚，且可為異姓後嗣。彼等之言曰：「我祖盤瓠，娶高辛氏第三公主，產三男一女，長盆姓，次藍姓，三雷姓，婿鐘姓也。」處州畚客最多，金華亦有之。

人名簿

林文忠有記人名簿四冊，分題千、古、江、山四字，凡姓之第一筆為丿者，入千簿；第一筆為一者，入古簿；、者入江簿；者入山簿。名下兼註字號籍貫，亦略載其言行。

皇室命名行派

乾隆間，皇六子永瑆繪《歲朝圖》進呈孝聖后，高宗題詩，有「永綿奕載奉慈娛」之句，其後命取「永綿奕載」四字為近支宗室命名行派，然未有明諭也。甲辰，親見皇長子定安親王生曹孫載錫，是為皇玄孫，五世一堂，因於雍和官後室及大內景福宮、避暑山莊，皆書揭「五代五福」堂額，誠古今帝王中所僅見者。道光丁亥，欽定續擬「溥毓恆啟」四字，其時溥字輩已命名奉字，皆令改之。咸豐丁巳，又欽定續擬「燾闡增祺」四字，均見諭旨。

孔氏命名之字派

曲阜孔氏為孔子之後，命名皆有字派，其遷徙他郡縣者，但係孔子嫡傳，亦必同一字派。蓋自元代之五□四代衍聖公名思晦者起，於是凡五□四代孫，均以思字為派。思字下為克字派，克字以下，則為希、言、公、彥、承、弘、聞、貞、尚、衍□派，再次則為興、毓、傳、繼、廣、昭、憲、慶、繁、祥□派，又次則為令、德、維、垂、佑、欽、紹、念、顯、揚□派。

蔣赫德自請於太宗而改名

蔣文肅赫德，初名元恆，灤州人。為諸生，即善望氣術。明天啟丁卯，蔣赴科場，夜聞明遠樓鼓聲，驚曰：「此頹敗之音，國安能久？」不終闌而去。游九邊，謂王氣聚於遼瀋，其間必生聖人。逾年，太宗入關，文肅杖策軍門，上閱其文，喜之，自請改名，遂攜出塞，不數載，大拜。

命名不合須更改

順治壬辰，諭：「臣民等如有以景字、泰字命名而下一字係齡、林等字者，兩字相連，兩昔相協，如策丹玉福之原名者，自當更改。」其用景字、泰字命名者原不在敬避之列。丙申，諭：「聖謨二字，豈臣下所可命名？嗣後遇有此等命名，不合者，即當留意更正。」

王揆以嫌名不獲首選

太倉王揆，煙客次子也，中順治乙未進士。館選日，某相欲薦之居首，及聞臚唱，揆字與「魁」音相近，世祖曰：「是負心王魁耶？」蓋小說家有王魁負桂英女事也。某相遂默然而止。

世祖為陳廷敬改名

陳文貞公廷敬，字子端，號悅巖，山西澤州人。順治戊戌進士，選庶吉士。文貞初名敬，以是科有同姓名者，世祖特加廷字別之，遂改今名。

五字名

順治初，天津有吳自初上舍者，性好奇，蓄兩僕，皆通曉文字，一曰明白而易曉，一曰一覽而無餘。

師生同名

康熙戊戌榜眼張廷璐，桐城文端公英第三子也。長兄廷瓚，康熙戊午北舉，己未進士。初，海寧有張英者，康熙癸丑進士，出文端門，師生同一姓名，當時以為奇。及戊午，海寧張英分校北闈，廷瓚又出其門，亦可謂會逢其適矣。

誤呼沈龢之名

吳江有廩生沈龢，順治中，江南督學御史某歲試點名，不解龢字，乃破龢而呼云合龍。

王綜不識自名

康熙間，蒲城王孝齋名綜，謁選縣令，唱名者讀綜為梁，王不應。唱至再三，王趨進曰：「知縣名讀如京，而呼作梁，未敢應耳。」吏部哄然曰：「汝進士出身，即爾名尚不識耶？綜為擊冠之聲，古謂之幘梁，故字書止有梁音。汝乃以偏傍讀之，謬矣。」

楊文定子名應詢

楊文定公艱於得子，康熙丙申，聖祖垂問及之，深為焦慮，奏云：「臣弟廩貢生楊名世，今年可望舉手，卸以為臣後。」名世果以是年生子，乃撫以為嗣，名應詢，蓋紀恩也。

臣工不避世宗嫌名

廟諱御名，前代懸為厲禁，列聖諭旨，亦祇令敬避下一字。世宗見臣工有避嫌名者，輒怒曰：「朕安得有許多名字？非朕名而

避，是不敬也。」

高宗惡滿人取漢名

高宗不喜滿人漸染漢俗，滿洲舊旗，有命名如漢人，以鈕祜祿氏為郎者，深鄙之，恐忘本也。

胡長齡以名得大魁

胡印渚，名長齡，乾隆朝，大魁天下。殿試時，胡卷本在進呈□本之末，時高宗春秋高，睹胡名，笑曰：「胡人乃長齡耶？」遂置第一。時和坤當國，胡會試時出和門下。胡本名士，重氣節，諗和不法狀，不趨謁，和銜之。胡為翰林□年，未得一差，典鬻殆盡，其友憫之。適和壽辰，友以烏劍墨仿胡體，書一聯為和壽，又丐某侍郎致意曰：「胡貧且病，衣服不完，不能趨賀。」和笑曰：「胡蠻子貧乃至此耶？」閱數日，遂拜山東學政之命。友又以烏劍墨書一刺，瞰和之亡而往謝焉，胡始終不知也。後和坤事敗，籍其家，朝臣中惟胡無片紙隻字，蓋烏劍所書字，經歲即脫，聯字漸滅久矣，由是胡為仁宗所重，累遷至禮部尚書。

陳文恭改名避弘字

陳文恭公宏謀，初名弘謀，乾隆丁亥三月，授東閣大學士、始奏請將原名改用宏字，恭避御名。前此數歷數□年，章奏書名，均與御名上一字同。

科爾沁王名□二字

高宗時，滿洲、蒙古大臣恆由上命之名，豐紳濟倫，本祇濟倫二字，豐紳為上所加，【豐紳，滿語，有福澤也。】御前行走科爾沁王鄂勒哲依忒木爾額爾克巴拜，亦上命之名。鄂勒哲依，蒙古語有福也。【哲依二字急讀。】忒木爾，有壽也。額爾克，鐵也。巴拜，寶也。王為大長公主所鍾愛，上幼時，期其有福有壽結實如鐵而又珍奇若寶也，故以是名之，一名至□二字，實為歷來所未有。

法式善改名

法式善，字開文，號時帆，原名運昌，蒙古正黃旗人。乾隆中，官庶子，奉旨改名，以示勉力上進之意。

朱白泉改名

朱白泉觀察朱爾廣額，為海愚運使長子，原名友桂，納賈為郎，入軍機，充滿章京。高宗雅不欲旗員命名與漢人同，乃改此四字，以漢譯之，即好古也。

王廣心原名誰

王廣心侍御，原名誰，年□三入泮。宗師怪其名，王應聲曰：「取蕭何之義耳。」宗師大賞之。

沈允與阮元

某縣文童沈允應試，學使以允字頗僻，詰其胡以取此，對曰：「古有伊尹，後有阮元，沈允亦猶是耳。」學使笑曰：「若亦知允字何義乎？」曰：「不知。」曰：「淫淫之行耳。」《說文》：「允，淫淫行貌。」故引以為戲也。

仁宗賜額威勇子名

額威勇公初有一子為侍衛，早卒，額方治軍，得書不言亦無戚容，夜歸帳，乃哀。明日，治事如故。回京後，復生一子，仁宗賜之名。甫數月額薨，上親臨奠，取其子置諸膝，即命襲封，逾歲亦卒。

仁宗賜百文敏子名

百文敏公壯年官京師。有子不育，屢荷仁宗垂廩。嘉慶辛未九年，萬壽之辰，樞臣面奏其得子，上喜甚，下詔曰：「百齡年逾六旬，望子甚切，連年任事，有裨封疆，故得上蒙天祐，老年生子。朕甚為欣悅，可賜名札拉芬。」【滿語長壽也。】百奏謝，手詔優答，有「天賜麟兒」語。

嚴可均名其子曰六孤

烏程嚴可均字鐵橋，有一子，初墮地，自卜子六齡當孤，因命名曰六孤。

同兒命名之原因

道光中，有貝勒奕繪者，篤嗜風雅，著有《明善堂集》，自號太素道人。其側室顧春，字子春，號太清，世皆稱之為太清春。太清常舉其族望曰西林，自署曰太清西林春。太清第三子名載同，在太素諸子中為行九。載同以道光甲午正月初五日生，時太素方三□六歲，與太素之生在其父榮格郡王三□六歲時同，且載同之生，與太清同日。太素有《生同兒》詩云：「先考三□六，生余頗憾遲。我年三□六，同兒生亦奇。生日同伊母，生年同我期。祝兒同父母，名同字同之。」是年□二月二□二日，以痘瘍，太素、太清皆以詩哭之。

宣宗賜福錕名

國家二百年來，宰臣媚內監者，以福錕為最。福本二□四門溥字行，其祖名奕溥，故特改名福，宣宗所錫也。

朱貞木改名應試

番禺朱貞木，未游庠時曾捐監生，後改名應童試，獲售，群起訐之。督學姚文僖公愛其才，置不問。

孫慶咸改名應試

孫山麓，會稽人，初名某，田於春官，北上屢不售。值咸豐紀元，舉行恩科，乃易名慶咸，以應其瑞。然當闈前訪友，猶用舊刺，其僕且不知有改名事也。試畢侯榜，不作第二人想。揭曉名，令僕往觀，已則秉燭以待之。已而報者紛至，同寓多獲雋者，而孫之捷音杳然也。無何，僕歸，默無一語，如已絕望矣，猶強詢之曰：「何如？」僕仍默無一語。孫曰：「然則會元何人？」曰：「亦孫姓，但其名為慶咸耳。」孫聞之，忽躍起，因罵其僕曰：「王八旦，即我也。」蓋喜極語促，不覺脫口而出耳。

曾文正李文忠之原名

曾文正公國藩，初名子城。李文忠公鴻章，初名章銅。

勒少仲初名人璧

江西勒少仲中丞應拔萃科時，名人璧，及選貢，學使曰：「爾當改名。勒人之璧，非盜賊而何？璧又與逼同音，既勒人，而又為人所逼，於義不可。」乃更名方錡。

游子岱初名於藝

湖南游子岱方伯智開，初名於藝，鄉試中式，主司喬勤恪公囑其改名。游問故，喬曰：「閱《日知錄》當知之。」後閱至黃幡綽敬新磨故事，始大悟，乃更名智開。

譚某某初名二監

茶陵譚某某，初名譚二監，謔者遂謂其兄必名譚太監矣。

許景澄初名癸身

許竹賞侍郎景澄，浙江秀水人，初名癸身。時仁和許庚身為軍機大臣，或疑為侍郎之兄，以令兄稱之。侍郎恚，乃易癸身為景澄。

孝欽后惡王國均之名

江蘇王頌平大令國均，同治戊辰進士，殿試已列入前□本卷，進呈乙覽矣。及臚唱，孝欽后以王國均三字之音，與「亡國君」同，不懌，乃抑置三甲。以知縣發安徽，被議改教職，司鐸山陽二□年，始以卓異選雲南某縣令，未之任而卒。

裕德貴秀鐵良錫良之諱名

裕德多忌諱，最惡人觸犯其先人之名。光緒某科人闈，嘗以其父名崇綸之故，令各房官不准薦直犯崇綸二字之卷，即拿破崙崙字，英倫倫敦之倫字，以與綸字同音，亦不得巧為回護。又一日，閱稿有「輪姦」字樣，囑司官改之。司官言此係律例應用之字，若大人欲改，請大人吩咐。裕不懌，卒亦無如何。左都御史貴秀，以京師韓家潭有優伶小班曰「貴秀堂」，因飭差往諭，勒令改堂名，曰犯諱也。

京諺謂嘲笑人為改人，新名詞有改良二字，眾皆習為口頭禪。光緒中，鐵良長陸軍部，有某司員陳說軍機須改良，鐵怒曰：「你剛纔說改什麼？」某懼而謝罪。錫良亦最惡此二字，有人提及，必斥之曰：「改什麼良？簡直改我罷了。」蓋二人皆名良也。

試差取吉名

光緒間，其科雲貴試差，所簡四人，考差均非前五名，孝欽后特圈出李哲明、劉彭年、張星吉、于齊慶，合成「明年吉慶」四字。軍機大臣面奏于簡副考官，有所未便，改派吳慶坻。初因駱成驥之名有二「馬」旁，吳鴻甲又有「鳥」字，均未能合格也。

三撫名片易一字

光緒間，江西巡撫德馨既解職，繼之者為德壽。德壽去，則繼之者為松壽。皮鹿門嘗語人曰：「此三人名片，但須易一字耳。」

名亨而不亨

光緒間，有田世亨字子貞者。其先世以武功為睢陽衛指揮，遂籍焉。幼喪父，復不慈於其母，凡冠婚諸事為人道所當有者，輒齟齬不得當，年益壯而窮益甚。布政使某，其父之同年生也，乃以書屬世亨於州牧某，曰：「此吾年家子也，幸善視之。」州牧召世亨湯沐之，置酒食，備主人禮。飲未半，僕人報某左官，草草罷去。已而有一人按察中州，亦其父同年也。世亨上謁，慰問周至，問有子讀書否，對以有子且讀書，則曰：「學使者吾密友也，呈當為游揚，隸若子於庠。」已而學使者遷去，遂不果。世亨每出，雖晴而中道必雨，歸則又晴。每訪人於附近村聚，其人必於前一二時許他出。或持錢入市，有所求，則所求之物適亡矣。如是者數年，累試不爽，人皆笑曰：「君名世亨，何竟無一事之亨也？」世亨因自號鈍菴。

弟以兩兄之名為名

長樂高氏昆仲三人，長名鳳岐，字嘯桐。光緒末，嘗權梧州守，被薦，試御史，名列第一而不用。次名而謙，字子益，官至雲南布政使。又次字夢旦，諸生也。則取長兄名之第一字，仲兄名之第二字，合而名之曰鳳謙。

漢人取滿名

漢軍取滿名者甚多，若漢人，則固絕無而僅有也。臨桂況夔笙太守周頤，嘗官內閣中書。在京日，得一子，甚慧，愛之篤，懼其夭也，為命名曰額爾克。額爾克，滿語也。以漢文譯之為鐵，欲其如鐵之堅固耐久也，然其後竟夭。

名重文

光、宣間，有主持君主立憲者曰劉少少，名為重文，下流社會恆有之，士人以重文為名，自少少始。

蒙人不得用漢字命名

內外札薩克汗王、貝勒、貝子、公、台吉、塔布囊等生子命名，均應取滿洲、蒙古字義，不得輒用漢字文義，違者以違制論。

麼些種人之名

雲南麼些種人無姓氏，以祖名末一字、父名末一字加一字為名，遞承而下，以判親疏。

名字

名字於人，要有關係，命意取類，不可不審，自古及今，從無名士通人取俗陋不堪之名字者，此可見也。古人名字，意多相屬，如仲由字子路，卜商字子夏，馯臂字子弓，孟軻字子輿之類，不可勝數，漢、魏猶然，自晉以後，乃不盡爾。

名字所取，根於心意，沿於習尚，因時變遷。總而觀之，可分六種：唐虞以上為一種，三代為一種，秦、漢、三國為一種，六朝為一種，唐至宋為一種，金、元至國朝為一種。其間雖有小出入，然大較如是。且國朝人之於名字，固尤為致意耳。

金聖歎改名字

金聖歎原名采，字若采，吳縣人。好飲酒。嘗於所居貫華堂中設高座，召徒講經，經史子集，縱橫顛倒，一以貫之。與王斲山最善。一日，斲山以三千金畀之，曰：「君可以此權子母，後日母仍歸我，以子金助君膏火資。」越月，罄矣，乃語斲山曰：「此物留君家，君適為守財虜，吾已為君盡之矣。」斲山一笑置之。及入國朝，絕意仕進，更名人瑞，字曰聖歎。或問以改字之義，則曰：「《論語》有兩喟然歎曰，在顏淵為歎聖，在曾點為聖歎，予其為點之流亞歎！」

兄弟之名字號如一

宗室寶廷，字竹坡，光緒中官禮部侍郎。嘗典試福建，以道經浙江，納九姓漁船女為妾，置吏議褫職。有二子，一名壽富，號伯福，別號一二；一名富壽，號仲福，別號二一。

名字合一

衣冠中人有名必有字，名與字皆著稱於時。若名字合一，而名即為字，字即為名者，順、康間，有李君燦者，即字君燦；道光中，有陽湖錢季重者，即字季重；光緒中有黃孝覺者，即字孝覺是也。

同時同姓字

康熙朝，有二人皆邵姓，一名長蘅，一名陵，皆字青門，皆以文學著稱於時。

二堂

江都焦里堂循，與甘泉江鄭堂藩，皆以淹博經史為藝苑所推，世有揚州二堂之目。

平良仄良

道光中，蘇郡有二人，皆字良甫，以詞鳴於江南。一曹楸堅，吳縣人，官至湖北按察使，有《曇雲閣詞鈔》。一趙函，震澤人，有《飛鴻閣琴意》。一時有平良、仄良之稱，蓋以其姓之平聲仄聲別之也。

以天文數目之字合為字

光緒中，粵西有秦書祥、于夔者，結友□人，講學論道。其取字甚奇，第一字皆屬天文，第二字皆屬數目。秦字雲五，取義於五色雲也。于字風八，取義於八方風也。有字雷一者，蓋取一聲雷之義也。有字星七者，蓋取七星之義也。其他多仿此，不悉憶矣。奏為光緒丙午舉人，于嘗行醫於廣州，著一書曰《醫醫醫》。

小字

順、康間，徽人相稱好用小字，雖卑幼於長老亦然，曾不以為忤也。

汪鈍翁程可則小字

汪鈍翁小字液仙，程可則小字佛壯。王阮亭有詩云：「佛壯談詩登祕閣，液仙趨府算錢刀。」【鈍翁先除戶部。】一佛一仙，天然對偶。

號重文

沛縣閻爾梅，字調鼎，明之遺民也。入本朝，隱居不出，著有《白耄山人》、《汧置草堂》等集。其號甚奇，曰古古，蓋重文也。與余盦【古文本字。】之字曰生生者同一新穎，特閻為號而余為字耳。

高宗自號□全老人

高宗耄期倦勤，自號□全老人。

文宗自號且樂道人

文宗之季年，東南淪胥於粵寇，京津見偏於英艦，內憂外患，宵旰靡寧。駕幸熱河，乃以且樂道人自號，蓋有得過且過之意也。

石瑤辰自號民傭

翼城石瑤辰司馬家紹嘗曰：「父母保抱其子，蓋日為傭而不自知也。」因自號民傭。

龔孝拱自號半倫

龔半倫，仁和人，為定菴子。初名公襄，字孝拱，繼更名曰刷刺，曰橙，曰太息，曰小定，曰昌匏，晚年自號半倫。半倫者，謂無君臣、父子、夫婦、昆弟、朋友，而尚愛一妾也。

左文襄自號老亮

左文襄公雅喜自負，與友人書翰，恆於其末自署老亮，蓋以諸葛自況也。嘗謂胡文忠公曰：「千秋萬世名，寂寞身後事，人生數□寒暑，烏能謀及來茲？但得生前自諡忠介先生，私願已滿，公其許我乎？」

吳大澂自號憲齋

吳大澂，字清卿，自號憲齋。嘗為潘文勤公祖蔭作篆，署號於紙尾，文勤奇之，不識也。此與某尚書謂章太炎所著《楮書》，曰那個什麼什麼字相同。

母以道人兒號其子

貞髦君，太原傅青主山母也。姓陳氏，父諱勳，忻州諸生。母周二□二歲，勵柏舟操，□七歲歸檀孟，為傅氏婦。舅御家嚴，諸婦中，陳獨以勤慎著。生子三，長庚，諸生，先卒；次即山，明崇禎甲申後以道人稱；三止，太學生。甲申後，山棄家而旅，隨所寓，奉母往，母絕不以舊業介意，沙蓬苦苣，怡然安之。順治甲午，山以飛語下獄，禍且不測，從山游者，僉議申救。貞髦君要眾語之云：「道人兒自然當有今日事，即死，亦分，不必救也。但吾兒止有一子眉，若果相念，眉得不死，以存傅氏之祀，足矣。」逾年，飛語白，山出獄，見母，母不甚悲，亦不甚喜，頷之而已。

人以避青先生號顧亭林

明杜既屋，顧亭林誓不損節，每屆端午，輒於門楣懸紅色蔓菁一，內實以蒜青少許，並掛白布一片於後，書「避青」二字，意示不直國朝惡而避之之義，人因稱之曰避青先生。嘗步行至江寧明孝陵，哭弔數次，往返數千里，不辭跋涉之苦也。

人以醉公號塞勒

塞勒，睿忠親王曾孫。性爽抗，嗜酒，雖朝會，氣猶醺然，人呼為醉公。然遇大事多直鯁。康熙戊戌，理王以罪黜，東宮虛位，聖祖命諸臣集議，時廉王覬覦大器，揆敘、王鴻緒左右之。塞憤怒，起於坐，大聲曰：「惟立雍親王，蒼生始蒙其福。」眾懼然。後世宗即位，召見，責之曰：「當日汝言，幾危朕躬，然忠鯁可嘉也。」塞免冠謝曰：「臣一時愚直，自不能遏抑耳。」

人以聖卵號朱崑侯

光緒朝，山陰有朱崑侯者，世家子也。中乙酉副貢，設帳授徒，究心濂洛關閩之學。里人迂之，以其效法孔子，具體而微，若已有孔子全體之一部分者。一部分為何？罌丸是也。罌丸即卵，遂以孔子之卵【山陰、會稽本有此諺，於人之講道學者輒以此四字稱之。】嘲之，呼曰聖卵。崑侯夙善八法，尚朱子，自是為人作書，輒署款曰「聖卵朱某」。